

- 6 Առ ոտս այնպիսի քաջ վարդապետին ,  
 Ի յընթացս ամաց երից և 'աւելի ,  
 Գէտ հանգիսացեալ Սարգիս ըստ կարի ,  
 Անցեալ զանցանէր զընկերս իւր դասի :
- 7 Որոյ աղագաւ ձեռնադրեալ լինի  
 Ի քսաներորդ երրորդի ամի 1722  
 Պատանեկութեան իւրոյ հասակին ,  
 Կիսասարկաւագ Սարկաւագ արհի :
- 8 Ապա իբր երից ամաց ըզկնի ,  
 Յետ ճիշդ քննութեան իւր վարդապետի ,  
 Ի 'այլոց իմաստնոց նորին դպրոցի ,  
 Արժանի գտեալ քահանայ օրհնի : 1725
- 9 Եւ ի նոյն աւուր ի յերեկոյի  
 Ընկալեալ վեղար Սրբոյն Անտոնի  
 Ըստ ծիսի Ազգիս կրօնաւորի ,  
 Մտեալ ընդ լծով վանական կարգի :
- 10 Շնորհ սուրբ օծման մաքուր Միւռնի  
 Քահանայադործ սուրբ պատարագի  
 Ի' ընկալման սրբոյ Հոգւոյն պարգեւի  
 Գործէր զնա միշտ ընտիր եւ բարի :
- 11 Այնուհետեւ նա բաղմաշխատ տքնէր ,  
 Ոգւով չափ ճգնեալ եւ եւս հետեւէր ,  
 Տեսական ուսման որ զԱստուծոյ էր ,  
 Եւ որ քարոզչաց յոյժ հարկաւորն էր :
- 12 Յաստուածաբանից մատեանս թափանցէր ,  
 Մեծ ուշադրութեամբ անդէն դադարէր ,  
 Կարծեաց մեկնութեանց նոցուն հաւանէր  
 Թէ յեկեղեցւոյ այնպէս վճռեալն էր :